



UNIVERSITÄTS-
BIBLIOTHEK
PADERBORN

**Florus Biblicus Seu Narrationes, Ex Veteri Testamento
Selectæ**

Pexenfelder, Michael

[S.l.], 1711

CXVI. Machabæanæ stirpis eradicatio. Herodis alienigenæ in regnum
Iudaicu[m] invasio. Herodiani nominis propagatio, & excisio.

[urn:nbn:de:hbz:466:1-64523](https://nbn-resolving.org/urn:nbn:de:hbz:466:1-64523)

am *Alexander* mox fecit successor, Hebræis *Ioannes*
ac *Ianneus* appellatus. Idem & cæteri deinceps Ma-
chabæorum nepotes ac pronepotes infelices pleri-
que Sadducææ sectæ asseclæ, ad Herodianam usque
Domum eis subrogatam, fecerunt. *Ioan. Biselius*
in Ruinis Illust. Dec. 3. n. 18.

NARRATIO CXVI.

MACHABÆANÆ
STIRPIS ERADICATIO.
HERODISALIENIGENAE IN
REGNUM JUDAICUM INVASIO HERO-
DIANI NOMINIS PROPAGATIO,
ET EXCISIO.

Ab anno M. 3951. ante Ch. 102. ad annum Mundi
4053. IESU Christi annum 1. quo anno Herodes
è vivis excessit.

Ex Flavio Iosepho, de antiquitatibus Judai-
cis, Lib. 13. 14. 15. 16. 17. 19. Et de
Bello Judaico lib. 1.

HActenus vestigia sacrorum Voluminum pres-
simus; nunc quoniam cum Machabæorum
occasu, Herodianæ familiæ fortuna misce-
tur, prosequemur ex Iosepho, Iudaico scriptore,
quæ historico sunt nexu colliganda.

Defuncto igitur, ut diximus, *Ioanne Hyrcano*,
(primo) *Aristobulus* natu filiorum maximus, Iudæi si-
bi regis nomen usurpavit; fratremque *Antigonum*

in societatem dominatûs adscivit ; cœteros eodem patre natos habuit in vinculis ; in quibus matrem fame enecavit ; paulloque post uxoris *Salomes* (quæ & *Alexandra* dicta est) artibus , Antigoni quoque , tanquam Regiæ , Pontificiæque dignitatis æmuli , sanguine manus imbuunt . Mox fraternæ cædis pœnitentiâ ductus , dirisque conscientiæ stimulis agitatus , morbum contrahit , & cum sanguinis vomitu scelestam animam eijcit . Argumentum divinæ vindictæ manifestum extitit , quod quidam è servulis cruentam saniem foràs efferens , eodem in loco effuderit , ubi cruoris fraterni maculæ terram infecerant . Successit in regno *Salome* , *Iannæ* quoque mariti fratrem (quem *Alexandrum* quoque vocant) è carcere ad solium evexit . Hic verò cum promiscuis cædibus tumultuaretur ; quinquaginta Iudæorum millibus intra sexennium interfectis , alterum quoque è duobus fratribus sustulit , alterum privatam vitam colere permisit . Immane vel auditum est ; Hebræorum procerum octingentos (quod tyrannidem ejus improbarent) inter epulas cum concubinis initas , excelsiore de loco , unde prospectus patebat , jussit crucibus affigi , & miserorum in oculis adhuc spirantium , uxores ac liberos jugulari . Ad extremum , morbo per temulentiam contracto , vino & sanguine ebrius , animam in tartareas flamas efflavit ; ubi prius uxori *Alexandriæ* deligendi Pontificis arbitrium permisit , & ut Phariseorum versutiâ regnum sibi stabiliret , admonuit . Illa monitis obsequens , omnia ad Phariseorum arbitrium retulit , & per horum conciones adeò sibi populum conciliavit , ut tyrannum epicedijs & sumptuosa funeratione

ne profecutus fit. Tanti interest, per quos, quòve
 prætextu quemque trahas. Erat ea tempestate Iu-
 dæa gens in duas maximè sectas sciffa; Nobilitas
Sadducaorum (qui eundem & corporum, & anima-
 rum interitum afferebant; populus verò *Phariseorum*
 dogmata, qui Stoico quodam superciliò legis divi-
 næ peritiam, & virtutis austeritatem, insigni cum
 hypocrifi professi sunt) complectebatur. Horum
 ergo viribus *Alexandra* suffulta, post nonum gu-
 bervationis annum, *Hyrcanum* (secundum hujus no-
 minis) filium natu majorem, quem jam antè Pon-
 tificatui præfecerat, successorem constituit. Hunc
 (quippe ad publicas curas languidiorem) *Aristobú-*
lus secundò genitus, & elegantia morum, ac cor-
 poris dignitate apud omnes gratiosus, armis victum,
 in ordinem redegit; ipse sceptrum & tiaram arri-
 puit. Quod utrumque, superveniens *Hierosoly-*
mam cum exercitu *Pompejus* ei rursus ademit; Pon-
 tificatum *Hyrcano* restituit; *Iudæam* tributariam
 Romanis fecit, *Antipatrò* ei præfectò gente *Idumæo*,
Herodis (qui ab urbe *Ascalone*, ubi educatus, *Ascalo-*
nites dictus) parente. *Aristobulum* cum filijs *Ro-*
mam abduxit: Templum *Solymæum* [quod vi ex-
 pugnaverit, duodecim *Iudæorum* millibus inter-
 emptis] ingressus victor, ex eo nihil abstulit, nec
 Sacris operantes *Sacerdotes* interturbavit.

Tum primùm libertas *Iudæorum* amiffa; urbes
 de *Syris* antehac captæ, iterum redditæ; regnum,
 à quo prius Pontificale genus honestatum, ad ple-
 bejos translatum: muri civitatis dejecti, circa an-
 num *Mundi* 3991. *Viginti* post annis *Pácorus*, *Orodis*
Parthorum Regis filius, plerâque *Syriâ* in potesta-

tem redactâ , *Hyrcanum* Romanorum [quibus infestus erat] amicum Pontificali dignitate exuit ; *Antigonum* , ejus ex fratre *Aristobulo* nepotem substituit ; ipsum *Hyrcanum* cum *Phaselo* [natu majore Antipatri filio , Iudææ præfecto] in vincula coniecit ; *Hyrcano* , ne spes ad pristinos honores relinquerentur , auriculæ amputantur ; *Phaselus* , desperatione adactus , alliso ad saxum capite vitam abrumpit . *Herodes* Antipatri filius natu minor , Galilææ principatum obtinens , in Arabiam , & inde Romam elabitur , Rex Iudææ à senatu appellatur ; *Antigonus* hostis declaratur . Qui deinde jussu *Marci Antonij* [pecunijs ab *Herode* ad id inducti] Antiochiæ in foro publico securi percussus est ; Antipatrum *Malichus* quidam , natione Arabs , vir militaribus factis apud Iudæos clarus , & *Hyrcani* partium studiosus , venenoin mensa propinato tollit ; *Malichum* *Herodes* per *Satellites* suos necat , redeunte in orbem vindictâ , & sanguine sanguinem expiante .

Herodes ubi paternis manibus , occisoris cæde parentavit , animum adjecit ad regnum sibi Iudæicum , non Romanorum tantum favore , sed regni quoque stirpis connexionione vindicandum . Ergo *Mariannem* , fæminarum decus , *Hyrcani* hoc tempore *Babylone* exulis , neptem , *Alexandri Iannæi* filiam , matrimonio sibi jungit ; *Aristobulum* , *Mariannes* fratrem , ad devinciendos sibi Iudæorum , *Alexandræ* præsertim matris animos , Pontificem creat ; *Marci Antonij* *Syriæ* Præsidis , ejusque amicorum favorem amplissimis sibi muneribus emit ; *plebem Solymæam* in suas partes adducit ; primates & adversæ factionis homines quotidianis supplicijs absumit ;

sumit; Alexandram focrum in regia sub molestis, & perpetuis observationibus continet. Quarum illa impatiens, cum Aristobulo filio fugam in Ægyptum ad reginam *Cleopatram* molitur. eam fugam ut celaret, uterque sandapilis inclusi velut mortui efferri debebant, & navigio ad id parato imponi. Fraudem deprehendit Herodes qui de suo ingenio, aliorum facilè conijciebat. consilia ultionis coquit; dissimulatam tantisper nocendi cupiditatem, in hunc denique modum exonerat.

Erat Herodes ab Alexandra [reconciliandæ gratiæ causâ] regali exceptus convivio, tempore, quò calores æstivi maximè fervere solent. Post epulas invitatur Aristobulus, adolescens septemdecim annorum ad piscinas, in proximo stagnantes. Ibi dum spectat æquales in undis, simul ludentes, simul æstum abluentes, incedit adolescentem cupido miscendi se natantibus. Illi, ut ab Herode erant edocti, innatantem undis, quasi per ludum & jocum arripiunt, sub aquas deprimunt, tamdiu detinentmersum, donec eliso spiritu suffocetur. Ingens exinde lamentatio matris Alexandræ, & sororis Mariamnes totamque per urbem Solymæam mœror; maximis enim spebus impleverat omnes, factus ad maxima quæque juvenilis Aristobuli genius, annos prudentiâ supergressus. Herodes, ut erat mille fallaciarum artifex, invidiam à se amoliturus, modis omnibus dat operam, ut ab ea nece planè alienum se fuisse demonstraret; oculos in fictas solvit lacrimas: funus effert magnificentissimo apparatu.

Alexandra nihilosecius patrati per generum facinoris certa, & in vindictam intenta, per litteras a-

pud *Cleopatram* Ægypti reginam de Herodis sævitia conqueritur ; perficitque , ut Antonius ad ejus criminis ultionem incitetur. Herodes igitur Laodicæam evocatur , de suspitione facinoris se purgaturus. Is tam causæ suæ diffidens , quàm odia Cleopatræ metuens , abiturus Hierosolymâ , curam regni *Iosepho* patruo committit , & clàm mandat , ut si Antonius gravius aliquid in se statuatur , Mariamnem interficiat , veritus , ne ex ea semen generi regio succitaretur. Quod quia Iosephus ad mulieres [*Alexandram* & *Mariamnem*] retulit , reversò mox è Syria Herode , violatum secretum capite luit. Antonius largitionibus corruptus , non modò sceleris Herodem absolvit ; sed insuper imperavit Cleopatræ , ut Cælesyriâ contenta , Iudæam ne affectaret ; néve Herodem beneficiò à se , senatùque Romano , ei collatò , privatum vellet. Iterum igitur exiit vulpes laqueum.

Post hæc nuntius perfertur , Antonij ad *Asiam* cum Cleopatra ab *Octavio Augusto* profligati ; Herodes ex ancipiti temporum mutatione pendens , Antonium à fortuna desertum , ipse quoque deserit : se ad amicitiam Octavij applicaturus *Rhodum* proficitur , ubi tum Cæsar morabatur. Sed quia scelerum conscientia mordente , timebat incertum profectionis suæ exitum , atrox capit consilium , tollendi omnes , quicumque ex stirpe Davidica superessent. Hyrcanus calumnijs appetitus , quasi regnum ambiisset , neci datur , mitissimi vir ingenij , privatâ vitâ contentus , nullis regni negotijs implicatus , ætate confectus [nâ octogesimû annum exceperat] propinqua affinitate conjunctus , quippe qui

neptem suam, ut diximus, Mariamnem Herodi desponderat, aliquot jam liberorum matrem. Neque stetit intra eos limites tyrannis. Alexandra & Mariamne [Salómæ, Herodis forori pridem invisæ] in munitissimo castro, cui *Alexandrium* nomen, collocantur, commissâ custodiâ, *Iosepho* quæstori suo, & *sohemo* cuidam ex purpuratis, Ituræo natione; quibus in mandatis dedit, ut, si quod nollet, accidisse sibi, cognoscerent, ambas interficerent, regnûmque Herodianis liberis, ac *Pherora* fratri conservarent.

Quibus mandatís, Rhodum properat ad Cæsarem; posito diademate, ad ejus colloquium admittitur: contestatur suorum in Antonium officiorum constantiam: pari se fide Cæsaris amicitiam culturum profitetur; addit munera octingentorum talentorum; præter ea, quæ in Cæsaris amicos, & exercitum distribuit. Quid multa? restituto diademate, in intimam familiaritatem recipitur. quâ subnixus, quod reliquum erat ex Hyrcani familia, ambitioni suæ immolat, sceptrumque Davidicum in alienam gentem jam antè translatum, tenaciùsprehendit. Domum enim reversus ex itinere Rhodio, cum Mariamnem uxorem, & Alexandram fororum, custodiâ liberatas, solitò tristiores reperisset (eis enim *Sohemus* sanguinariûm Regis mandatum prodiderat) à matre, & sorore Salóme novis suspicionibus oneratus, Mariamnem violati tori, & veneni sibi parati postulat; eámque innocentem & indefensam capitali supplicio plecti jubet. Illa necem intrepido non minùs animo, quàm corpore excepit; colore vultûs & venustatis decore, ne eo qui-

dem temporis articulo, mutato. Secus Alexan-
dra fatum suum tulit, mulier ut ambitione non in-
tacta, sic ad ultimam necessitatem subeundam haud
mediocriter perturbata. Sohemio quoque secreti
manifestatio capite stetit. Cæterum Herodem in-
terfectæ uxoris tanta mox misericordia simul & pe-
nitentia cepit, ut præ doloris ac amoris impotentia,
in ejulatus & lamenta effusus, sæpe nomen Mariam-
nes inclamaret; eamque, quasi adhuc viveret, per
ministros advocari juberet. Deinde specie venati-
onis in solitudinem sese abdere, & hominum confor-
tium, velut immanis bellua, fugere. Manes cer-
tè interfectorum ita premebant tyrannum, ut proxi-
mus à desperatione abesset. Rursus tantâ trucu-
lentiâ efferebatur, ut quamvis pestilentia grassans
multa mortalium millia absumeret, ipse tamen
haud satur funerum, ne ab intimis quidem amicis
sanguinarias manus abstineret. Ad eò nova sem-
per rabie exardescunt, quos semel humani sangui-
nis sitis accendit.

Sub hæc amicorum & medicorum consiliò, ut a-
nimum à tristibus curis abstraheret, eum ad ludo-
rum & ædificationum cogitationes traduxit. In-
ter prima opera, fuere certamina Athletica, quin-
to quoque anno in honorem Augusti Cæsaris cele-
branda: Theatrum exinde & Amphitheatrum
Hierosolymis opere sumptuoso exstructum; ædes
præterea regię excitatæ, nomen Cæsaris & Agrip-
pæ [qui Cæsari Charissimus] præferentes. Fana
quoque & urbes, inter quas Cæsaræa, eundem in
finem conditæ. Et quia Iudaicam imprimis gen-
tem sibi devotam volebat, ejus sibi studia, religi-
onis

onis specie comparanda duxit. Templum igitur instaurat, spatij dilatat, porticibus novis exornat, aliisque præclaris operibus Romanorum & Iudæorum benevolentiam: nominis verò Herodiani gloriam & immortalitatem quærit.

Inter hæc iterum in Aula turbatum. *Antipater*, Herodi ex *Devide* natus [plures enim habebat pelli-ces] ut *Alexandrum* & *Aristobulum*, Mariamnæ filios & successionem regni dimoveat, confictis insidiarum calumnijs, adeò parentem in eos exacerbat, ut is non dubitaret illos coram Augusto intentati veneficij accusare. Cùm verò criminationi argumenta deessent idonea, & Iuvenes dudum Augusto Romæ perspecti, verbis se & lacrimis ejus sceleris infontes ostenderent, omnibus, etiam accusatore, ad commiserationem permotis, Cæsar patrem, filiosque in mutuam concordiam, & complexus lacrimis mixtos reduxit, Antipatrò per nefariam simulationem utrisque eam reconciliationem gratulante. Sed paullò post iterum erupit perfidus animus. Herodes novis in filios criminationibus circumventus ab Antipatro, eò pertrahitur, ut in eos tanquam parricidas Iudex idem & Accusator animadversurus, reliquos etiam adigeret Iudices ad innoxium sanguinem, insuper habitâ contestatione innocentia, condemnandum; quare *Sebaston* ducti, ibi parentis iussu strangulantur, & in castro Alexandrio, sepulchro inferuntur.

Antipater sublatis fratribus, gradu ad supremam impietatem factò, parenti quoque necem intentat, veneno ad id ex urbe Roma per procuratorem suum misso, ut suspicio parricidij in absente ne hæret

ret. Nec melior filiō mater ejus, Doris, *Pheror* am
Herodis fratrem, multorum malorum cinifionem,
ne ambitiosis Antipatri consilijs obstaret, infusō to-
xicō perdit; quod Salius scribit ad ann. Mundi
4051. Iosephus naturali morte absumptum refert.
Antipatrum quoque non diutiūs scelerum poenae
sunt remoratae. Meditati namque parricidij con-
victus, in vincula conijcitur; regni successioni *Antipatras*,
Archelaō & Philippō, ob calumnias per Antipatrum
structas, praeteritis. Mox iterum mutatis testa-
menti tabulis, Archelaus successor regni constitui-
tur: Philippo & Antipae provinciae assignantur. Sed
Augusto Caesari placuit Iudaeam in quatuor partes,
seu *tetrarchias* dividere. E quibus duas Archelaus
concessit, regium quoque nomen pollicitus, si eo
dignum se redderet. Partes reliquas in duos fra-
tres partitus est. Herodi Antipae Galilaea, regio-
que Iordanis transamnana, Philippo Trachonitis &
Iturea cessit.

Et quia Ambitio tam multa timet, quam multa
sperat. Herodes sceptro suo periculum etiam ab in-
fantibus formidavit. Intellexerat e tribus regulis,
ab Oriente profectis, ipsos stella interprete didicif-
se recens nati Iudaeorum Regis ortum, tum enim-
vero Herodes timore concuti, & omnis cum eo Ie-
rosolyma turbari. metum augebant divinae periti
Legis, qui ea de re interrogati, responderunt in O-
raculis esse, Bethlemum oppidum venturo Messae
natale fore. Potuit tyrannus, mens nisi laeva ful-
set, pullum innido cum matre sua deprehendere.
maluit advenas exploratores praemittere, & per eos
cer-

certiora cognoscere. At illi astro duce Magni cunabula Regis venerati, elusa Herodis expectatione, aliâ, quàm advenerant viâ, patrios lares repetierunt. Nunquam aliàs ita furor efferbuit. Mox clamabatur ad arma, expediuntur milites, veriùs carnifices, ætati lactenti bellum indicitur. Pendentes ab uberibus matrum parvuli ad quatuordecim millia crudeli ferro perimuntur. nec tamen in tanto numero is invenitur, propter quem cadebantur. Macrobius auctor est, ejus rei famâ Romam perlata, Augustum dixisse: *malle se Herodis porcum, quàm filium esse*; [neque enim suomet sanguini pepercit] à porcorum namque religionis prætextu abstinebatur, non item à cæde hominum.

Et parùm fuit lupo teneros in artus grassari, nisi sanguinariam gulam nobiliore cervice exsatiaret. Infandum dictu! Desperata valetudine, Jerichuntem se contulit, eoque minacibus edictis omnem Judæorum nobilitatem convocavit; præsentem Circo Amphitheatrali inclusit; deinde accersitis ad se sorori Salômæ; ejusque marito *Alexæ* in supremis mandatis dedit, totam ut gentem, ne sine luctu publico efferretur, in lacrymas darent, omnibus illis, quos Circo tanquam cassibus sepserat, telorum imbre confixis, eò temporis articulò, quò è vivis ipse excessisset. Violentas deinde manus sibi admoventi, [quid enim aliud supererat homini, Superis hominibusque exosissimo?] cum excuteretur culter ab *Achiabo*, ex sorore nepote; Antipater in vinculis eo tumultu excitatus, necémque ratus esse paratam, egit cum carceris custode, ut dimitteretur.

Re

Re ad Herodem delata, submissus est satelles, qui hominem sine mora de medio tolleret, præcocis ambitionis pœnas daturum.

Hoc ad inferos præmissô, mox insecutus est paricidam paricida; nam quinta post infanticidium patratum die [ut vult Cornel. in cap. 27. Eccli.] aut anno Christi octavo, juxta Baronium. Aut potius anno Chr. primo, eodem scilicet, quô Infantes interfecti (uti cum multis sentit Salianus, scelerosam efflavit animam; postquam febris, tussi, dysenteria, podagra, bulimô, seu caninâ appetentiâ, phthiriasi sive morbo pediculari, putredine verendorum, asthmate, & fœtore diu cruciatus, ut fuit flagitiorum, ita morborum teterrimorum theatrum factus est, & interitu funestissimo comprobavit dictum Sacerdotis: *Laqueo peribunt, qui oblectantur casu iustorum: dolor autem consumet illos, priusquam moriantur.* Eccli. 27.

Cæterum Salome & Alexas haud immeritô veritate demandata crudelitas in suamet capita verteret, clausos in Circo Iudæorum proceres, antequam Regis mors innotesceret, domum suam quemque dimiserunt. Recitatae dehinc ad milites testamenti tabulæ, quibus Archelaus successor institutus, omnium acclamationem & applausum habuerunt. Favianus regio more curatum est, & monumento [quod ipse sibi in Herodio castro splendidum exstruxerat] illatum, animâ jam tum in tartareis rogis meritisimas pœnas luente. Vir erat artium Politicarum peritissimus, quibus privati sortem mutaverat regiam; pravè tamen ijs usus, suorum cruore totus immaduit; immanitatis & libidinis prodigium, ut qui,

teste Iosepho apud *Baron. in ann. Ch. 8.* effrænata libidine virgines constupraret, & thoros alieni conjugij sæpius, vi adhibita, violaret ac fœdaret. Nullumque tam magnum scelus, tam magnum facinus reperiri potuit, ad quod vel illecebris voluptatis, vel impetu furoris ac crudelitatis non impelleretur.

Archelaus, digna parente soboles, nonô post initum Principatum annô, dominationis tyrannicæ à Iudæis apud Augustum C. postulatus, condemnatusque, in exilium Viennam, urbem Gallia relegatur; pecunia fisco addicitur regio; urbibus Syria, à Romanis subjugatæ, & in provinciam redactæ, attribuitur, anno Christi decimo sexto. Procurator ejus seu Præses, Româ submissus est *Valerius Gratus*; cui post undecimum annum in eo magistratû exactum, successit anno Ch 28. *Pontius Pilatus*, qui JESUM, humani generis Servatorem iniquissima morte condemnavit. Ipse verò de munerum corruptelis, rapinis, injurijs & cædibus innocentum, apud C. Caligulam Cæsarem accusatus, deportatur in Galliam, Viennæque perpetuo exilio inclusus, impatientiâ malorum, sibi necem conscivit, anno Chr. 41. Philippus & Antipas, Archelai fratres, in suæ ditionis seu tetrarchiæ dominatu perseverare permitti. Uterque mali corvi, malum ovum. Antipas Philippi fratris uxorem incesto thalamo polluit, & Ioannem Baptistam conjecit in vincula, quòd nefariam consuetudinem liberius arguisset; cujus abscissum caput Herodiadi filia in Satisfactionis præmium cessit. S. Hieronymus tradit, Herodiadem insultasse præcilo Ioannis capiti, atque acu discriminali sanctissimam illam linguam perforasse;

rasse; Ut Fulvia quondam Antonij Triumviri uxor
 in disertissimam Ciceronis linguam sæviit. Ipsa sal-
 taticula brevî post pœnas solvit, quando adstrictas
 gelu aquas transiens, rupta sub pedibus impijs gla-
 cie, abscindendum crustis caput dedit, etiam tunc
 portentosum in modum subsiliens, & choreas, qui-
 bus viva affueverat, mortua continuans. Ab eo-
 dem Antipa Christus, Æterna Sapientia, morionis
 instar & amentis, ludibrijs exagitatus est; Non im-
 punè. Nam ad Cajum Caligulam delatus, quod
 cum *Sejano* in *Tiberium* conspirasset, & invocatis *Ar-
 tabani*, Regis Parthorum armis, defectionem molli-
 tus esset; perpetuò exulatum, Lugdunum mitti-
 tur, anno Ch. 40. qui inde fugitans in Hispaniam
 unà cum Herodiade, incesta conjuge tandem perijs,
 mœrore consumptus. Ejus tetrarchia Herodi *A-
 grippæ*, Infanticidæ Herodis, ex Aristobulo filio,
 nepoti conceditur; mox etiam Iudaicum regnum à
 Cajo jam antè collatum, à Tiberio Claudio Dru-
 so Imp. confirmatur & augetur. Memorabile est,
 quod de ferrea illius, aureaque catena à Iosepho scri-
 bitur. Nam Romæ dum esset, quod inconsultè ni-
 mis Tiberio Imp. mortem, imperium verò C. Ca-
 ligulæ precatus fuisset, quem ejusdem Tiberij iul-
 su, quasi morum moderator sectabatur, addictus est
 carceri, vinctusque mansit ad usque Tiberij mor-
 tem. Cui successus Cajus, Agrippam non modo
 vinculis solvit, sed statim in regnum avitum resti-
 tuit, donatum prius aurea catenâ, ejusdem omni-
 no ponderis cum ferrea, quàm Tiberius injecerat,
 eique Herodis Antipæ tetrarchiam adjunxit. Eam
 catenam monumentum utriusque fortunæ Agrippa
 fers.

suspendit in templo Hierosolymitano, ut doceret, altissima quæque facile prolabi, rursusque inclinata restitui posse. Is Iacobum [cognomento Majorem, Joannis Apostoli fratrem] Ierosolymis capite minuit Anno Ch. 44. Actor. 12. Idem perfecturus in Petro, nisi in capite servasset Ecclesiam Christus, ipsumque ruptis vinculis è carcere per Angelum eduxisset. Actor. cap. cit. Viri hujus superbia, cujus administra sævities (nam occisio Iacobus, videns, quia placeret Iudæis, apposuit ut apprehenderet & Petrum. loc. cit.) geminis, & miris exemplis est castigata. Nam cum Romam redux à Caio Cæsare honoribus & favoribus auctus, Iudæam navigando repeteret, Alexandria exscendit; ibi cum ejus satellitium, argenteis clypeis, & inauratis armis nitidum, omnium oculos in se converteret; Alexandrini (quippe Ægyptij, quorum inveterata cum Iudæis similtas) invidia tanti splendoris ducti, publice convitijs eum & contumelijs inceserunt. nam præter maledicentiam & dicteria passim jactata, homo quidam emoti cerebri [Carrabas appellabatur] in ludibrium Agrippæ, Rex extemporalis esse iustus; pro diademate papyraceum involucrum, pro paludamento stoream, pro sceptro fragmentum arundinis gestavit. Diceres illusi personam Christi, & ultionem, in novissimo hoc Iudæorum Rege fuisse repetitam; nam & nomen Carraba vicinum Barabæ, & rerum utrinque gestarum convenientia est. Baronius ex Philone ad annum Ch. 40. Ad ignominiam verò Agrippæ, etiam exitium accessit; quando Cæsareæ [olim turris Stratonis vocabatur] solennes ludos pro salute Caij Imperatoris celebraturus, in the-

Q 9

atrum

atrum processit, veste argentea, sceptro, coronâ
 radians, & omnibus spectantibus [ingens multitu-
 do nobilium & Procerum convenerat] majorem
 hominem mortali, sui venerationem incutiens, De-
 us à populo consalutabatur; utque propitium esset
 Numen invocantibus, per summam adulationem
 rogabatur. Ille vocibus assentantium delectatus,
 tantò celeriore sensit vindicis DEI manum, quan-
 tò similiorem se DEO putabat, aut credi volebat.
 Nam fortè suspiciens, vidit bubonem funi extento
 insidentem [*Iosephus antiq. lib. 19. cap. 7.*] agnitòque
 calamitatis nuntiò, repentè conflictatus dolore a-
 cerrimo, ac putrescente in vermes corpore, infeli-
 cem spiritum in orcum emisit. Anno Ch. 46. A-
 ctor. cap. 12. Atque eò hunc in modum miserrimè
 extinctò, permissum diadema ab Imp. Claudio, e-
 jus filio *Agrippæ* [cognomine *Iunioris*] qui cum soro-
 re *Bernice*, seu *Berenice* [quam velut uxorem circum-
 ducebat] *Paulum* audivit Cæsareæ, eloquentia cæle-
 sti perorantem. Actor. 25. & 26. A Iudæis deinde
 contra Romanos tumultuantibus, primò Hieroso-
 lymâ, non sine contumelijs & lapidum insectatio-
 ne; mox toto regnò pulsus, Romam profugit, ibi-
 que reliquum vitæ privatus exegit, sceptro Iudaico
 Romanos in fascès plenè translato [anno Ch. 68.]
 non multò post [anno Ch. 72.] Ierosolymam, & om-
 nem Iudæorum gentem excisuros. Varia ex his dis-
 ces Lector, hoc præ reliquis, ut ne dubites, DEI
 Vindicem oculum, in mortalium crimina vigilare,
 neque velis invidere improborum feli-
 citati.